

重修
植物名實圖考

小野職慤重修
毒草類

廿四
下

白附子

別錄、白附子、主心痛、血痺、面上百病、行藥勢、生蜀郡、三月採、陶隱居云、此物乃言出芮芮久絕俗、無復真者、今人乃作之獻用、唐本草註、此物本出高麗、今出涼州巴西、形似天雄、生沙中、獨莖似鼠尾草、葉生穗間、

海藥本草、按南州記云、生東海、及新羅國、苗與附子相似、大溫、有小毒、主治疥癬、風瘡、頭面痕、陰囊下濕、腿無力、諸風冷氣、入面脂、皆好也、

天南星



天南星



天南星



天南星



天南星 即虎掌

天南星、本經、下品、昔人皆以南星翦頭、往往誤采、不可不辨、江西荒阜廢圃、率多南星、湖南長沙、產南星、俗呼蛇芋、衡山產翦頭、俗呼磨芋、亦曰鬼芋、滇南圃中、翦頭林立、南星絕少、藥肆所用、皆由跋也、由跋、自是一種、唐本草謂南星、是由跋宿根所生、驗之、亦殊不然、而南星與翦頭根、雖類、莖葉花實、絕不相同、半夏由跋、花似南星、而皆三葉、由跋、又有六七葉者、俗皆呼小南星、但南星生葉、亦有兩種、一種、葉抱如環、一種、周圍生葉、長如芍藥、開花有如海芋者、卽圖經所云、花似蛇頭、黃色、一種、開花、有長梢寸餘、結實、作紅藍色、大如石榴子、又似玉蜀黍形、而梢微、齊明王佐詩、君看天南星、處處入本草、夫何生海南、而能濟饑飽、蓋誤以翦頭爲南星也、

天南星、本經、下品、江西湖廣、山坡廢圃、多有之、俗呼蛇芋、與蒟蒻相類、惟葉初生、相抱如環、開花、頂上有長梢寸餘、爲異、不僅以莖之有斑無斑可辨、

〔長編〕開寶本草、天南星、味苦辛、有毒、主中風、除痰、麻痺、下氣、破堅積、消癰腫、利
胃膈、散血墮胎、生平澤、處處有之、葉似薊葉、根如芋、二月八月採之、
日華子云、味辛烈、平、畏附子、乾薑、生薑、罌撲、損瘀血、主蛇蟲咬、疥癬、惡瘡、入藥
炮用、又名鬼薊、

圖經曰、天南星、本經不載、所出州土、云生平澤、今處處有之、二月生苗、似荷梗、
莖高一尺以來、葉如薊葉、兩枝相抱、五月開花、似蛇頭、黃色、七月結子、作穗、似
石榴子、紅色、根似芋而圓、二月八月採根、亦與薊根相類、人多誤採、莖斑花
紫、是薊葉、一說、天南星、如本草所說、卽虎掌也、小者、名由跋、後人採用、乃別立
二名爾、今天南星、大者、四邊皆有子、採時、盡削去之、又陳藏器云、半夏、高一二
尺、由跋、高一二寸、此正誤相反言也、今由跋苗、高一二尺、莖似薊葉、而無斑、根
如雞卵、半夏、高一二寸、亦有盈尺者、根如小指、正圓也、江南吳中、又有白薊葉、
亦曰鬼芋、根都似天南星、生下平澤極多、皆雜採以爲天南星、了不可辨、市中

所收、往往是也、但天南星小、柔膩肌細、炮之易裂、差可辨爾、古方多用虎掌、不言天南星、天南星、近出唐世、中風痰毒方中、多用之、續傳信方、治風痛、用天南星、躑躅花、並生時同搗羅、作餅子、甑上蒸四五遍、以稀葛囊盛之、候要卽取、焙搗爲末、蒸餅丸、如梧桐子、溫酒下三丸、腰腳骨痛、空心服、手臂痛、食後服、大良、

虎掌


本草經、虎掌、味苦溫、主心痛、寒熱、結氣、積聚、伏梁傷、筋痿拘緩、利水道、別錄、微寒、有大毒、除陰、下濕、風眩、生漢中山谷、及冤句、二月八月、採陰乾、蜀漆爲之使、惡莽草、陶隱居云、近道亦有、形似半夏、但皆大、四邊有子、如虎掌、今用、多破之、或三四片爾、方藥亦不甚用也、

唐本草注云、此藥、是由跋宿者、其苗一莖、莖頭一葉、枝丫扶莖、根大者如拳、小者如雞卵、都似扁柿、四畔有圓牙、看如虎掌、故有此名、其由跋、是新根、猶大於半夏、二三倍、但四畔無子牙爾、陶云、虎掌似半夏、卽由跋、以由跋爲半夏、釋由

跋苗、全說鳶尾、南人至今猶用由跋爲半夏也、

圖經曰、虎掌生漢中山谷、及冤句、今河北州郡亦有之、初生根如豆大、漸長大、似半夏而扁、累年者其根圓及寸、大者如雞卵、周匝生圓牙、二三枚、或五六枚、三四月生苗、高尺餘、獨莖、上有葉如瓜、五六出、分布、尖而圓、一窠生七八莖、時出一莖、作穗直上、如鼠尾、中生一葉、如匙、裏莖作房、傍開一口、上下尖、中有花、微青褐色、結實如麻子大、熟卽白色、自落布地、一子生一窠、九月苗殘、取根、以湯入器中、漬五七日、湯冷乃易、日換三四遍、洗去涎、暴乾用之、或再火炮、今冀州人、菜園中種之、亦呼爲天南星、江州有一種草、葉大如掌、面青背紫、四畔有芽、如虎掌、生三四葉爲一本、冬青、治心痛、寒熱、積氣、不結花實、與此名同、故附見之、

由跋



由跋

由跋、本經、下品、蜀本草、一莖八九葉、最晰、俗皆呼小南星、別是一種、非南星之新根也、陳藏器所述不誤、

〔長編〕別錄、由跋、主毒腫、結熱、陶隱居云、本出始興、今都下亦種之、狀如烏翬、而布地、花紫色、根似附子、苦酒磨塗腫、亦效、不入餘藥、唐本草注云、由跋根、尋陶所注、乃是鳶尾根、卽鳶頭也、由跋、今南人以爲半夏、頓爾乖越、非惟不識半夏、亦不知由跋與鳶尾也、

蜀本圖經、春抽一莖、莖端有八九葉、根圓扁、而肉白色、


本草綱目、李時珍曰、此卽天南星之小者、其氣未足、不堪服食、故醫方罕用、惟重八九錢、至一兩餘者、氣足乃佳、正如附子之側子、不如附子之義也、

按、由跋、唐本草、以爲南星新根、今江西、有一種小南星、獨莖、生葉如半夏、而不止三葉、與蜀本圖經、莖端有八九葉、相符、似由跋、又非南星之旁牙、如時

珍所云者、然較半夏、莖高根大、不能代半夏用也、



半夏



半夏

半夏、本經、下品、所在皆有、有長葉圓葉二種、同生一處、夏亦開花、如南星而小、其梢上翹似蝎尾、固始呼爲蝎子草、凡蝎螫、以根傅之、能止痛、錢相公篋中方、亦載之、諸家本草、俱未及此、本草會編謂、俗以半夏性燥、多以貝母代之、不知痰火上攻、昏潰口噤、自非半夏南星、曷可治乎、半夏、一莖三葉、諸書無異詞、而原圖、一莖一葉、前尖後歧、乃似茨姑葉、余曾遣人繪川貝母圖、正與此合、豈互相舛誤耶、抑俗方、只此一物、而兩用耶、二者皆與圖說不相應、非書不備、則別一物、

雋農曰、半夏、處處有之、乃以鵲山爲佳、余讀孔平仲詩、而啞然也、藥物雖已法製、非棗栗之覓可比、何至據攬代攘、辛螫啼噪耶、其末云、老兄好服食、似此亦可防、急難我輩事、感惕成此章、始知婉言以諷、非真實耳、昔人好食竹雞、尙能中毒、況服半夏過度、豈不爲害、

〔長編〕本草經、半夏、味辛平、主傷寒、寒熱、心下堅、下氣、喉咽腫痛、頭眩、胃脹、欬逆、腸鳴、止汗、一名地文、一名水玉、禮記月令、半夏生、別錄、生微寒、熟溫、有毒、消心腹胃膈熱痰、滿結、欬嗽、上氣、心下急痛、堅痞、時氣、嘔逆、消癰腫、墮胎、療痿黃、悅澤面目、生令人吐、熟令人下、用之、湯洗令滑盡、一名守田、一名和姑、生槐里川谷、五月八月、採根暴乾、陶隱居云、槐里屬扶風、今第一出青州、吳中亦有、以肉白者爲佳、不厭陳久、用之、皆先湯洗十許過、令滑盡、不爾、戟人咽喉、方中有半夏、必須生薑者、亦以制其毒故也、

圖經曰、半夏、生槐里川谷、今在處有之、以齊州者爲佳、二月生苗、一莖、莖端三葉、淺綠色、頗似竹葉、而光、江南者、似芍藥葉、其根下相重生、上大下小、皮黃肉白、五月八月內、採根、以灰裹二日、湯洗暴乾、一云、五月採者、虛小、八月採者、實大、然以圓白陳久者爲佳、其平澤生者、甚小、名羊眼半夏、又由跋、絕類半夏、而苗高近一二尺許、根如雞卵大、多生林下、或云、卽虎掌之小者、足以相亂、半夏